

摘藻堂四庫全書薈要

集部

欽定四庫全書薈要卷一萬三千五百八十二

集部

王子安集卷八

唐 王勃 撰

表

上九成宮頌表

臣勃言臣聞帝機無朕道洽則時邕靈化不言功成則
頌顯伏惟陛下體元纂極模神建隧棟梁三氣庭階六
合松軒夜警香冥姑射之心茅殿晨凝寥廓峒山之駕
臣霑風太上庇影華胥仰衢室而無階候襄城而有地

雖望卑平叔空勤景福之詞而文謝子雲願竭甘泉之
思謹憑天造輒貢九成宮頌二十四章攀紫墀而絕望
叫丹闕而累息臣誠惶誠恐死罪死罪謹言

上拜南郊頌表

臣伏見總章元年十二月四日詔既清東寇將覲南岳
甫資元勲旋窺大典伏惟皇帝陛下黼藻神器銜策睿
圖用天老之前機戮防風之後至為而不恃懸寶位於
中宸卑以自居託靈符於上帝禮凝蒼壁瑞溢玄圭紫
旻降祐黃祇叶矩微臣學不照古才不曠時窺宇宙之
神功覩郊禋之盛節時非苟邁懷雅頌而知歸道不虛
行想謳歌而有志豈與夫周傳考室裁稱棟宇之規漢

奏甘泉未息嬉遊之諷比興衰於列代較馳驟於同衢
而已謹憑天則輒貢拜南郊頌十章文不足奇意有遺
美臣誠惶誠恐謹言

為原州趙長史請為父度人表

臣某言臣聞奉忠履義帝業所資昭德報功王風是切
臣父故臣使持節都督豐州諸軍事豐州刺史上柱
國南康郡王士達往因隋季預奉皇初于時元洛未清
雙嶠尚梗江淮海岳王公數十父身羈偽鄭寵極戎
庭掃千載之風雲擁三河之士馬情思奉順義不圖生
綿越寇塲密歸誠欵登太行而耀甲則建德離心出函
谷而揚麾則王充破膽天書屢降手勅仍存洎乎九服

又安四方無事謀臣出鎮猛將臨邊西窮赤水之源東
究青丘之境橫戈北塞盡沙漠之風塵授鉞南荒被牂
牁之矢石義形夷險迹遍疆場分閫淹榮懸車遂禮雖
死於牖下實懷天子之恩力盡方隅無媿忠臣之節今
者歸藏有日先遠戒期陛下德被游菟惠流枯骨高班
厚祿已極於生前列鼓鳴簫復光於身後誠非毀滅所
能投報但臣霜露之感瞻彼岼而神銷烏鳥之誠俯寒
泉而思咽希開淨福庶補窮埏伏惟陛下恢不次之恩

錄無涯之請使獲從朝例賜許度人濟沉識於昏塗拯
亾靈於毀宅則陛下乾坤之施既不隔於幽明微臣螻
蟻之心豈忘情於家國是所圖也非敢望也輕黷冤旒
若墜氷谷

啟

上從舅侍郎啟

勃啟一昨弟勛至奉命以憲臺詩十首垂示氣橫霜署
彩洞雲局繡衣兼藻肆之華白簡控玄機之奧仙驄在
馭踐文路而驅神冠解下臨望詞林而直指勃質惟茅
艾名隔縉紳虛霑自出之榮每媿諸甥之列恩華曲被
誨誘傍臨識謝知音榮深覩典虞韶忽奏聽律呂而忘
疲楚匣遙開仰光茫而不暇昔孔融之逢元禮罕睹高

文王祭之謁伯喈終慚懿戚援今企古議德疇恩荷慄
兼儲悲欣兩集但才非酷似攀宅相而多慚慕切如存
臨渭陽而增感不勝荷戴屏營之至

上武侍極啟

勃啟勃聞玄螭掩耀光銷赤堇之芒白鶴摧輝影滅青
胡之寶絲是紫霄氣耿指牛漢而忘歸丹水神迷道驪
泉而罔悔其有龍文已遠輕圖剗兕之功魚目濫持自
疑靈虵之色循榮覽分朝聞夕可君侯締華椒閣席寵
芝局粲貂冕於金軒藻龜章於玉署月開鸞鏡懷精鑑
以分形霜湛虬鐘蘊希聲而待物吞九溟於筆海若控
牛涔抗五岳於詞峯如臨蟻垤馳魂霧谷忻逢紫岫之

英驛思霞丘佇接青田之響勃北巖曲藝東臯下節攀
翰苑而思齊儔文風而立至迹疲千里未陪丹轂之遊
葉契三英尚隔黃衣之夢謹憑洪貸輒錄舊文輕敢上
呈列之如右涓波有託望日谷以馳誠鐘鼓無施伏雷
門而假息謹啟

又

勃啟一昨不緣媒紹輕承盼飾祇寵相驚俯仰無地何
則循方極弊尚虧風雨之間撫翼濡鱗猶失江湖之上
況乎九天鵬術一代龍門榮枯外致山川在目而可以
追騰白日忘言於咫尺之書干突青雲投跡於尋常之
境徒以北林增秀弱翰知歸東壑流謙纖緒未已神交
道合君侯昭片善之榮千載一時下走得長鳴之所是
用謬憑高獎曲撰蕪音游海無際過雷自讐雖黃金激

憤指秦路而方窮蒼壁慚恩伏焦原而未遠謹啟

上李常伯啟

勃啟勃聞杞林騰秀羽族知歸暘谷流謙波臣有託然
則朝光八聖尚欣牧豎之詞道濟五殘未隔輿人之誦
謹憑斯義輒呈宸遊東岳頌一首當仁不讓下走無慚
於自媒聞善若驚明公豈難於知我龍門高遠眇黃道
而無階爵里既投叫丹閣而有地伏願暫停左右曲流
國士之恩廣進芻蕘俯息樵夫之議輕陳徑捷退用彷徨

惶

上皇甫常伯啟

勃啟一昨奉命令寫新對臺策及前後舊文謹憑國士之恩敢進與人之頌竊以龍鑣就路駑駘相懸鵲鏡臨春妍媸自遠亦有飛霜匝地蘭蕭銜共盡之悲列火埋岡玉石抱俱焚之慘然則知音罕嗣流水空存至寶不同荆山有淚君侯飾揚芻議提獎蕪詞白圭成再見之榮黃金定一言之重鵬鷺既接仰雲逕而將趨龍阪可登指星臺而有望循襟佩德撫事知恩山岳有輕河漢

無極謹啟

又

勃啟自恭陳薄技祇奉話言咳唾成恩盼睞為飾征夫
擊節方思孤竹之風壯士寒心實有長楊之作謹憑嚴
命輕呈乾元殿頌一首將冀導江至海常以筆札見知
南館西園遂與簪纓為伍德雖無盡攀驥尾而方遙生
也有涯比鴻毛而非重謹啟

上吏部裴侍郎啟

勃啟猥承衡鏡驟照堦墀本慚刀筆之工虛荷雕蟲之
睠殊恩屢及嚴命頻加賁光耀於昏冥課宮商於寂寞
進退惟谷憂喜聚門誠恐下官冒輕進之譏使君侯招
過聽之議貴賤交失恩愛兩虧所以戰懼盈旬遲迴改
朔懷鄭璞而增愧捧燕珉而自恥勃性惟慵昧識謝沉
冥蒙父兄訓導之恩藉朋友琢磨之義好學近乎智力
行近乎仁知忠孝為九德之源故造次必於是審名利

為五常之賊故顛沛而思遠雖未之逮也亦有其志焉
孔子曰言及之而不言謂之隱今者接君侯者三矣承
招延者再矣抑亦可以言乎夫文章之道自古稱難聖
人以開物成務君子以立言見志遺雅背訓孟子不為
勸百諷一揚雄所恥苟非可以甄明大義矯正末流俗
化資以興衰家國繇其輕重古人未嘗留心也自微言
既絕斯文不振屈宋導澆源於前枚馬張淫風於後談
人主者以宮室苑囿為雄叙名流者以沉酗驕奢為達

故魏文用之而中國衰宋武貴之而江東亂雖沈謝爭
驚適先兆齊梁之危徐庾竝馳不能免周陳之禍於是
識其道者卷舌而不言明其弊者拂衣而徑逝潛夫昌
言之論作之而有逆於時周公孔氏之教存之而不行
於代天下之文靡不壞矣國家應千載之期恢百王之
業天地靜默陰陽順序方欲激揚正道大庇生人黜非
聖之書除不稽之論牧童頓顙思進皇謀樵夫拭目願
談王道崇大廈者非一木之材匡敝俗者非一日之衛

衆持則力盡真長則偽銷自然之數也君侯受朝廷之
寄掌銘範之權至於舞詠澆淳好尚邪正宜深以為念
也伏見銓擢之次每以詩賦為先誠恐君侯器人於翰
墨之間求材於簡牘之際果未足以採取英秀斟酌高
賢者也徒使駿骨長朽真龍不降銜才飾智者奔馳於
末流懷真蘊璞者栖遑於下列易不云乎言行君子之
所以動天地失之毫釐差以千里書不云乎敝化奢麗
萬世同流餘風未殄公其念哉嗟乎蓋有識天人之幽

致明國家之大體辨焉而不窮酌焉而不竭抱膝無悶
盱衡自得彼悠悠小技焉足為君侯道矣自非奉閒宴
接清談未可一二言也然竊不自揆嘗著文章非敢自
媒聊以恭命謹錄古君臣讚十篇并序雖不足塵高識
之門亦可以見小人之志也伏願暫停左右少察胸襟
觀述作之所存知用心之有地謹啟

上明員外啟

勃啟側聞金烏聳轡俯圓燧而抽光瑤兔浮輪候方諸
而吐液斯則洪纖異數冥符造化之津高下相懸精契
陶鈞之表故知聲同義合存長幼於三州理隔氣殊置
山川於一面神交可託風雲於杵臼之間道不虛行涇
渭於簪裾之列其有跡申知己投爵里於思齊事迫當
仁抱龍泉而願割雖荆山已峻多輕抵鵲之珍而渤澥
方春敢進歸鳧之景伏惟丈人珠躔降德銑社抽英河

岳縱其神器煙霞發其符采江東第一家傳正始之音
日下無雙譽重名流之首三冬文史先兆跡於青衿百
里絃歌即馳芳於墨綬彭澤陶潛之菊勝氣仍存河陽
潘岳之花芳風遂遠榮加從袂上清蘭府之遊寵奪攀
輪更掌蓬山之務麟圖緝謚定榮辱於三泉鵷閣裁書
考薰蕕於四部既鶴鳴雲路望偃朝端鴻漸星臺俯諧
僉議廉平譽號李宣伯之當官雅操繩時山巨源之稱
職加以文場武庫發揮廊廟之師瓊樹瑤林寥廓風塵

之表一丘一壑同阮籍於西山一嘯一歌列嵇康於北
面詞條鬱霧遙騰駕日之陰辨鍰橫霜直上衝星之氣
鳬鐘蓄韻聞片言而指掌鸞鏡懸心見一善而明目情
源九派士流欣滿腹之期德宇千門詞人有庇身之望
方當坐談帝席雄視羣公豈徒比迹天府雌伏郎官而
已哉勃崇徽啟緒盛德在家承太子之仙宗沂將軍之
遠系朱輪在漢列高士於三台青蓋浮江扈平王於七
姓遺風舊烈尚存清白之基祖德家聲代有縱橫之目

及金陵東覆玉馬西奔髦頭傑起文儒繼出鳳鳴朝日
森梢煙雨之標龍躍雲津盤礴江山之氣雖雄名雅譽
隨朔野而揚聲而華寃雕軒北南風而不競陳太丘之
積善羔鴈成羣謝車騎之餘芳蘭蓀不替趨庭洽訓共
歌朱萼之篇避席承歡猶守青箱之業嘗謂酣神北阜
藉春渚而忘歸動影南樞坐秋山而長往不意蘭皋獨
嘯輕交委鶴之書芝澗行謠坐辱飛龍之使年殊賈誼
仰宣室而方同業謝劉繇俯長途而遂惡塞上浮雲之

跡空倦吳山隨侯明月之珠終悲暗室豈不知拂衣長
謝林泉多倨俗之因安枕有餘廟堂非養高之所松楸
坐月臨黛壑而遐征桂席攀風俯青嶠而自足而欲俛
首屈膝逡巡多士之林弔影慚魂骯髒文昌之府徒以
牛蹄已倦臨文壑而驤鱗羊角可逢想高衢而撫翼參
名國士方叨智伯之恩揮迹奉常冀雪公孫之恥識正
平於處士雖在孔融期仲容於望外終資許允猶恐先
馳折翮頻驚鵠路之風再舉枯鱗空擊龍門之水丈人

借以顏色資以恩波垂雅契於長年叙情交於累代情
加倒屣知步頃之生光禮極升堂覺聲名之有地是用
俯抽丹思上瀆清顏鏤殊獎於肝膽銜德音於咳唾懦
夫增氣先歌易水之風壯士投心思赴吳宮之火恩崇
命淺瞻呂梁而可泛山高海深涉孟門而何險謹啟

上許左丞啟

勃啟自遠阻恩華嬰纏風恙守愚空谷斂跡仙臺同衛
玠之虛羸談非正始愧劉楨之逸氣臥似漳濱朝野既
殊風猷遂隔望芝蘭之漸遠覺鄙恡之都生所以暫下
松丘言游洛邑永懷前倦逡巡元禮之門延首下風匍
匐文章之府實願稍捐人事少奉清言質儒釋之幽疑
訪空玄之極境願聞者道敢披江海之心祈進者榮非
慕軒裳之重雖齒絕位殊空塵左右而道存目擊豈隔

形體輕陟階堂伏深悸越謹啟

上郎都督啟

勃啟勃聞古之君子重神交而貴道合者以其得披心
胸而盡志義也是以叔牙苟在管仲分多而不貪無知
尚存陳平受謗而非罪何則達其趣者能申其迹收其
大者能讓其細也今勃東鄙之一書生耳少懷耿亮頗
慕高烈俛仰相得則屠博可遊造次不諧則軒冕異路
蒙君侯國士之遇受君侯長者之禮繼繿談譔殷勤誨
誘今有情而不告是不盡也有窘而不託是有疑也將

恐季布無侶於後葉孫臏獨稱於前古嗟乎可以竭誠
矣敢不盡言乎勃家大人天下獨行者也性惡儲斂家
無擔石自延國譴遠宰邊隅常願全雅志於暮齒揚素
風於下邑而道里夤遙資糧窘鮮秩寡鍾釜債盈數萬
此勃所以側目扼腕臨深履薄庶逢知己之厚以成大
人之峻節也古人有言富觀其所與貧觀其所取又曰
損有餘補不足於君侯何如哉然則定其交而後求敢
無愧已易其心而後語夫何飾讓賑給之義既惟其常

厚薄之差伏希俯訪輕塵視聽倍增兢惕

王子安集卷八

謹案卷六第四頁前五行無慚於景燭云爾刊本
燭作躅據文苑英華改

第五頁後二行僉為文在我卜翰苑當仁十字內
疑有訛脫

第六頁前五行黃雀度而颺驚刊本雀作鵲檢風
土記仲夏風名黃雀風今據改

第九頁前一行春日孫學士宅宴序刊本脫士字
據文苑英華目錄增


第十三頁後二行想衣冠于舊國句下刊本脫去
十八字據文苑英華補

卷七第三頁後二行綠滕朱紱刊本滕作縑據文
苑英華改

第四頁前七行策藜杖而非筵刊本杖訛杖今改
第六頁後一行金石絲竹之音徽刊本徽訛輝今
改

卷八第十五頁後二行森梢煙雨之標刊本梢訛

峭據文苑英華改



總校官庶吉士臣侍朝

校對官編修臣沈清藻

謄錄監生臣蕭準

謄錄監生臣馮國柄

欽定四庫全書

藝文類聚

集部

王子安集卷九至
十一

詳校官助教臣常循



欽定四庫全書薈要卷一萬三千五百八十三

集部

王子安集卷九

唐 王勃 撰

書

上劉右相書

蓋聞聖人以四海為家英宰與千齡合契用能不行而

至春霆仗天地之威以息相吹時雨鬱山川之兆故有
玄蛟晚集憑鶴鼎而先鳴蒼兕晨驚運龍韜而首出竝
能風騰霧躍指麾成烈士之致蠖屈虬奔談笑坐羣卿

之右未如越蒼海棄行間排紫微謁天子於是遭不諱
之主擁非常之位龍章鳳黻照其前鏘金鳴玉疊其後
三靈叶贊超然奉天下之圖四海承平高步取寰中之
託君侯之富貴足矣聖朝之付遇深矣故知陽侯息浪
長鯨臥橫海之鱗風伯停機大鵬鍛垂天之翼及其投
形巨壑觸丹浦而雷奔假勢靈颺指青霄而電擊神氣
洋洋謂鱗翮使之然也殊不知兩儀超忽動止繫於無
垠萬化糾紛舒卷存乎非我是以陳平昔之智士也俯

同降卒百里奚曩之達人也親為餓隸當其背強敵轉
康衢雄慮耿於風雲危途迫於朝夕豈自期榮稱相府
西藩專虎據之圖寵冠齋壇東向舉熊飛之策顧盼可
以蕩山岳咄嗟可以降雷雨遂令用與不用是非於楚
漢之間知與不知得失於虞秦之際故死生有數審窮
達者繫於天材運相符決行藏者定於已君侯足下可
不謂然乎借如勃者眇小之一書生耳曾無繫鐘鼎石
之榮非有南隘北閣之援山野悖其心迹煙霧養其神

爽未嘗降身摧氣逡巡於列相之門竊譽于時甫匐於
羣公之室所以慷慨於君侯者有氣存乎心耳實以四
海兄弟齊遠契於蕭韓千載風雲託神知於管鮑不然
則荷裳桂楫拂衣於東海之東茵閣松楹高枕於北山
之北焉復區區屑屑踐名利之門哉至尊以搖河徙岳
之威當立地開天之運聖人有作羣材畢舉星辰入仕
揖讓朱鳥之門風雨稱臣奔走蒼龍之闕方欲停旒金
室引成康於已任闢廣瑤林復堯舜於茲日可謂明明

欽定四庫全書薈要

集部

王子安集卷九至
十一

詳校官助教臣常循



欽定四庫全書會要卷一萬三千五百八十三

集部

王子安集卷九

唐 王勃 撰

書

上劉右相書

蓋聞聖人以四海為家英宰與千齡合契用能不行而

至春霆仗天地之威以息相吹時雨鬱山川之兆故有
玄蛟晚集憑鶴鼎而先鳴蒼兕晨驚運龍韜而首出竝
能風騰霧躍指麾成烈士之致螻屈虬奔談笑坐羣卿

之右未如越蒼海棄行間排紫微謁天子於是遭不諱
之主擁非常之位龍章鳳黻照其前鏘金鳴玉疊其後
三靈叶贊超然奉天下之圖四海承平高步取寰中之
託君侯之富貴足矣聖朝之付遇深矣故知陽侯息浪
長鯨臥橫海之鱗風伯停機大鵬鍛垂天之翼及其投
形巨壑觸丹浦而雷奔假勢靈颺指青霄而電擊神氣
洋洋謂鱗翮使之然也殊不知兩儀超忽動止繫於無
垠萬化糾紛舒卷存乎非我是以陳平昔之智士也俯

同降卒百里奚曩之達人也親為餓隸當其背強敵轉
康衢雄慮耿於風雲危途迫於朝夕豈自期榮稱相府
西藩專虎據之圖寵冠齋壇東向舉熊飛之策顧盼可
以蕩山岳咄嗟可以降雷雨遂令用與不用是非於楚
漢之間知與不知得失於虞秦之際故死生有數審窮
達者繫於天材運相符決行藏者定於已君侯足下可
不謂然乎偕如勃者眇小之一書生耳曾無繫鐘鼎石
之榮非有南隘北閣之援山野悖其心迹煙霧養其神

爽未嘗降身摧氣逡巡於列相之門竊譽于時甫匐於
羣公之室所以慷慨於君侯者有氣存乎心耳實以四
海兄弟齊遠契於蕭韓千載風雲託神知於管鮑不然
則荷裳桂楫拂衣於東海之東茵閣松楹高枕於北山
之北焉復區區屑屑踐名利之門哉至尊以搖河徙岳
之威當立地開天之運聖人有作羣材畢舉星辰入仕
揖讓朱鳥之門風雨稱臣奔走蒼龍之闕方欲停旒金
室引成康於已任闢廣瑤林復堯舜於茲日可謂明明

穆穆盡天子之容貌矣抑嘗聞之丹山九仞煙峰非數
簣之功紫極千門雲臺俟萬楹之力故天下至曠神器
不可獨專天道無私玄勲有待而立書曰元首明哉股
肱良哉好問則裕自用則小况掌萬國之權受一人之
寵動見臧否言知利害君侯足下何時易耶雖有大命
不資童子之言而恭此小心敢進狂夫之說伏見遼陽
未靖大軍頻進有識寒心羣黎破膽昔明王之制國也
自近而及遠先仁而後罰徵實則效存徇名則功淺是

以農疏千里僅踰重石之鄉禹截九州不叙流沙之境
豈才不及而智有遺哉將以辨離方而存正功也雖至
人無外甲兵曜天子之威王事有征金鼓發將軍之氣
而長城在界秦漢所以失全昌巨海橫流天地所以限
殊俗闢土數千里無益神封勤兵十八萬空疲帝卒驚
烽走傳駭秦洛之氓飛芻輓粟竭淮海之費於是乘奸
放命者出繩纏以生威因公挾私者入閭閻而競法雖
一物失所泰階延吁食之憂而百戰方雄中國鮮終年

之樂圖得而不圖失知利而不知害移手足之病成腹
心之疾征稅屈於東西威信蹇於表裏語曰勝之不武
不勝為辱天下之責四面至矣誠可遠凝高策上薦忠
言決人事於去就合天情於終始遂令回麾轉檄背青
丘而驚列障分亭巡蒼波而守昔者齊侯以力方城為
楚國之辭虞帝崇文苗人失洞庭之險況乎仗德綏亂
以直乘邪明逆順之端聳華夷之望雖復舳艫沸海旌
旗觸天鐵山四面金城千里亦不能為敵人計矣此君

侯之未諭一也蓋聞星迴日運御洪荒者貞夫一電照
風行制寥廓者歸乎靜易曰復其見天地之心乎語曰
動之斯和綏之斯來是知源潔則流清形端則影直大
道起而仁義息神化周而市獄定雖復體元立教膏災
耀知遠之書順時宰物宥罪發精微之典而况澆風易
漸淳化難歸孔明耿介於當朝子輿殷勤於易簣蓋有
繇也伏見邊凶尚梗殊恩屢發亡命山澤者日月相趨
朝脫桎梏夕還囹圄姦徒抱袂因時立僥倖之謀頑夫

頓足中路紆吁嗟之慘皆繇寬勝於猛人迷所習勸沮
不彰廉恥相冒亦有公卿失職恥受珪符之任郎官有
豐俯捨銅墨之榮又焉可以弘獎風流抑揚衆務者也
且夫朽索充羈不收奔馬之逸輕緡振網或隨吞舟之
勢況非常之化方洽於齊人無妄之恩乃及於羣小將
恐匡衡管仲復靈沼於下泉矣古之善為國者不然信
賞而必罰道德而齊禮澤配雲雨而無曲惠威匹雷霆
而絕私戮交書聳幣仗慈厚之師投金散壁樹仁明之

長故雖開衢室蓋明堂亦將四三皇而六五帝矣此君
侯之未諭二也蓋易曰天地之大德曰生聖人之大寶
曰位何以守位曰人何以聚人曰財是知發揮地利農
桑啟其業振蕩天功泉貝流其用伏覩前制屢擾事非
畫一厘市蕭然人情怪動夫補簡竝用未盡交易之宜
輕重齊行適啟兼并之路於是連闕掩闔者閉肆而乘
其屈布衣常帶者闔門而受其困五方競爽務淺術以
相雄百郡爭勝驅末技而成弊田夫織婦衣食鮮終朝

之給巨駟洪商輿馬挾封君之勢蓋有繇來矣故曰國
儲闕於九載則公上無所給家廩乏於三年則妻子非
其有夫陰陽覆逆天地之常數百六運窮堯湯所不免
一旦洪泉決地大旱焦山風雨於一歲之間霜電於數
州之境繁運廣役首尾於中外沓稅增徭日夕於都鄙
變陰陽者將何以處之一夫竊議公之盛德虧矣愚謂
嚴程峻法絕輕陋之貨則奸鎔之源塞矣沿風正典重
耕耘之務則邪贏之計沮矣然後遠弘教旨大變流俗

法立有犯而必施令出唯行而不返違公竊鑄者具五
刑之戮因時力田者懸一命之賞不然則賈生晁錯復
流涕而言矣此君侯之未諭三也嵩衡不拒細壤故能
崇其峻江海不讓纖流所以存其廣是以星臺曉闕上
台忘吐握之勞月殿宵興中宇軫山林之慕知夫御天
下者必待人也詩曰濟濟多士文王以寧未見君子憂
心如醉伏見皇明遠燭帝采遐宣張樂岱郊騰勲社首
徵廉察孝瑤壇虛不次之階署行議年璿檢動非常之

詔天下可謂幸甚矣於是友月朋霞之客背青臯而至
馮唐顏駟之才排紫閣而集夫豈知終始異數涇渭同
流蘿薜失圖簪纓解體惜哉羣英霧散名侯招蔽善之
嫌天下雷同君子鮮長鳴之地而欲招絕足致真龍難
矣此君侯之未諭四也易曰拔茅連茹以其彙征吉豈
非順物不若招類報國不如進賢陽事昇而雨露歸陰
駕凝而風霜厲莫不觀時有記撫氣相求窮則獨善其
私達則兼善天下而利己疵物者以自任為身謀知進

忘退者謂專榮而得計豈知夫尺波易謝寸晷難留陵
谷好遷乾坤忌滿君侯足下出納王命升降天衢激揚
鳳宸之前趨步麟臺之上亦復知天下有遺俊乎夫心
之精微口不能言也言之微妙書不能文也伏願關東
閣開北堂待之以上賓期之以國士使得披肝膽布腹
心大論古今之利害高談帝王之綱紀然後鷹揚豹變
出蓬戶而拜青墀附景搏風捨臺衣而見絳闕幸甚斯
不為難矣庶幾乎麤卯不棄終感玄枵之精駿骨時收

或致飛黃之錫書生王勃死罪死罪再拜

上絳州上官司馬書

月日龍門百姓王勃再拜奉書于司馬上官公足下蓋
聞靈化出於窈冥帝圖寄於寥廓聖人生而萬物睹太
階平而四國會故曰有非常之后者必有非常之臣有
非常之臣者必有非常之績至今雷奔雨嘯風旋電轉
拾青紫於俯仰取公卿於朝夕雲臺迫漢南宮列元宰
之圖霜戟羅門北闕據名臣之第嘗見之矣至若時非
我與雄略頓於窮途道不吾行高材屈於卑勢孔宣父

之英達位未列於陪臣管公明之傑秀名僅終於郡屬
有時無主賈生獻流涕之書有志無時孟軻養浩然之
氣則亦有焉豈非妙造無端盛衰止乎其域神期有待
動靜牽乎所遇向使太公失於周伯則旗亭之屠父韓
信屈於蕭何則轅門之餓隸又焉得鷹揚豹變吐納風
雲者哉故曰知與不知用與不用觀夫得失之際亦窮
達之有數乎其有邀時譽忘廉恥徇苟得設向背於朝
廷立縱橫於勢利舉三寸之舌屈辱豪門奉咫尺之書

逡巡下席皆自謂材足以動俗智足以濟時鐘鼎輝其
顧盼冠蓋生其籍甚豈知夫四海君子攘袂而恥之乎
五尺微童所以固窮而不為也此蓋莊周有言所以得
意而忘象得象而忘言語曰談何容易稱書不盡言
知談之不易而欲言之盡以是思之良可知矣下官者
康衢之賤耳嘗聞闕里之言頗挂平輿之目豈不知塵
形俗狀游水鏡而多慚抱鼓援輦偶雷門而自失而欲
刺鵠飾鳧唐突局餘者邪徒以登山泛海庶測高深執

炬傳螢希增日月三奔九合下官聞管仲之風千載一時君侯受鮑卿之託是敢陳其徑庭不然則秋風明月西江留獨往之因桂嶠松巖南山有不羣之地矧區區者而重高明之閫闔哉君侯極天分構振瓊樹而韜霞帶地疏源握珠胎而冠月鱗軒羽殿瑤臺降卿相之榮鵲印蟬簪金社發公侯之始青臯獨唳望鴻漸而翻霞丹穴高鳴對鵷池而矯霧嚴助以賢良待詔未厭承明汲黯以方正拾遺終榮臥理藩維克振既叅來暮之歌

邦國不空自有康沂之相加以雄材廣度散琬琰於胸
懷逸氣適文運風霜於掌握迫青霄而構舍煙霞之涯
涖莫尋振滄渤以流謙江漢之波瀾未測耀靈桂於趙
席垂棘知歸辯群籟於莊軒懸匏自託賓階夕敞清河
銷驥繫之虞虛榻晨披元禮得龍驅之地方當翊贊宸
極羽儀台屏豈徒偃仰州縣勞事藩庭而已哉借如僕
者言不滿於鄉黨聲不出於堂閭東海取樂於簞瓢南
山畢志於文史餐花佩葉入蘭室而談玄挹露攀霞坐

松局而嘯逸楊子雲之澹泊心竊慕之嵇叔夜之逍遙
真其好也未嘗露才揚已飾小智以驚愚假勢憑時託
中人而樹迹遍遊天下寒心於將相之門獨守太玄側
身於名利之境嘗謂奉琴卮於北牖詠詩禮於南陔坐
商洛而折雲英臨江湖而採煙液生願畢矣而屬鸞局
停逸頻虛不次之階鶴板徵賢累發非常之詔天下有
道吾豈匏瓜承達人一顧之榮辱公車再辟之禮平津
侯之博物終屈奉常賈大夫之才名猶逢絳灌况庸者

而可免於此乎君侯要津先據圖海盛於當時下官覆
簣方勤為山始於今日雖陵深谷變終非入室之賓而
晝詠宵吟敢預升堂之列夫以幽明不測尺標見天下
之心巨細相傾寸管合義舒之度豈非道存斯貴理在
必亨霸略近發於輿歌皇圖不隔於芻議故有榮枯絕
等奉推轂而欣然年勢不侔受分庭而罔愧風規可接
惟君侯體之今古未殊則下官願矣常恨霜松列澗萬
尋無罩月之期露草滋山寸莖有梢雲之望斯則聲實

困於兼濟才位難於俱立况乎地勢不足以誇俗容貌
不足以動人遑遑藪澤安足以奉高明之咳唾也所冀
蠅階賤質附雲足而追飈蚘序輕姿託霜毛而絕海委
名勵已蛟鰲申獨斷之能偶迹當仁驪珠鮮闇投之懼
天衢可望指鵬程而三休巨壑難遊伏龍門而一息勃
死罪死罪

為人與蜀城父老書

蓋聞天地作極不能遷否泰之期川岳薦靈不能改窮
通之數豈非聖賢同業存乎我者所謂才榮辱異流牽
乎彼者所謂命是以龍驤鳳峙一作翥伊周成翊贊之功

含糗羹藜顏冉困棲遲之病或先號而後笑或始吉而
終凶事不可量功未必定則知洪濤未接長鯨多陸死
之憂層風未翔大鵬有雲傾之勢池鰭井鮒亦將鼓鱗
而輕之田鳩野鸚亦將騫翮而侮之及衝溟渤接扶搖

吹波則江漢倒流騰氣則虹霓掩彩摩赤岸負蒼天然
後知其力焉吁韓信之無津也昌亭之一餓夫耳馬卿
之失路也臨邛之一食客耳武不足以服衆文不足以
動時長劍屈於無知洪筆淪於不用洎乎雄圖躡運至
尊納背水之謀麗藻昇朝天子賞凌雲之作威加海岳
聲振廊廟彼淮陰之俠少成都之遺老也又焉能知遠
近哉是以鑑物於輦不於成賞士於窮不於達是知卞
和之得玉也精存於岸谷之間張華之得劍也氣發於

星辰之際夫豈琢磨成器然後知其寶剗斷為能然後知其用哉仰惟鄉耆等竝玉山高族金堤勝侶列子弟於干城耀衣冠於百代或以風雲去國公孫躍馬之年鐘鼎從王諸葛攀龍之日門庭相接雕甍將綺棟連陳機杼相和鳳鑷將虬梭交響金漿玉饌食客三千綠幘青裳家僮數百沖襟渺識人多江漢之靈麗藻華文代有雲泉之氣北齋開敞南館虛閒詩酒同歸琴書合契忘機得意恥嵇阮之交疎虛席延賓恨原嘗之客少實

煙霞之藪澤風月之津梁者乎劉仲文之遠識不以乾
沒詣梁城閔仲叔之高風不以口腹累安邑雖其已沒
生氣猶存況乎屬宇宙之明當天下之泰不能俯拾青
紫高視縉紳攀北極而謁帝王入南宮而取卿相脅肩
側足求哀鍾釜之間低首俛眉取齊升斗之末嗟乎誠
下官所以仰天漢而鬱拂臨江山而慷慨者也但時可
以未遇道可以未行志願可以未成功業可以未就古
之才足以輔王業躡迹屠釣之間功可以濟巨川藏身

版築之下百里奚之負販陳湯之丐貸而況於庸者哉
此僕所以駿奔於顧盼之餘自致於恩光之末也且夫
精神所感尚動神明意氣相交豈慚車馬倘能投心季
子遙存素紵之恩援手應侯先立綈袍之贈豈人之情
也能無報乎方今白藏紹序朱律謝期天高而林野疎
候肅而江山靜輕蟬送夏驚晚吹於風園旅鴈乘秋動
宵吟於露渚絲纈成於南畝秔黍被於東阡時計有儲
願履多福下官薄游綿載飄寓淹時歡躋相仍憂虞自

積陟梁鴻之峻岳何暇長謠臨阮籍之長途唯知慟哭
庶憑賙給以濟飄危輕訴短懷佇流嘉耗

又

蜀都廣鎮岷嶽興壤山分玉宇水向金陵景貺有期英
靈間出榮問休暢幸甚幸甚夫神有可迫淥波驚七柱
之音道有可符玄霜扣九鐘之節豈道窮精秘妙聽察
於無聲理實杳冥玄應通於不測波流柱響波無入柱
之因霜落鐘鳴霜非扣鐘之具況乎言忘意得臭味相
求目擊道存神明已接鄭僑之逢吳札無謂殊方阮籍
之對嵇康自然同氣僕雖不敏嘗從事於斯矣嘗謂薰

猶不共器梟鸞不比翼是以類乎方者按風雲於千里
乖乎類者起山川於一面抑嘗聞之士之生也其迹可
擯而道不可藏其身可辱而志不可奪其有拂衣投臂
遡形滄海之隅裂裳裹足獨立高山之頂量腹而食度
身而衣以鐘鼎為芻豢以衣冠為縲紲方欲策鸞鳳而
撫雲英鞭虹霓而採煙液其次排玉闕指金門成賈誼
之謨樹終軍之策因機入務懷素將相之門沐露沾霜
擁筆公侯之室然則拾青紫於旦暮取功名於俄頃演

文物而動寰中騰聲名而振天下若下官者可謂慚二
途矣而斂手長揖強顏高視低心於蹇躓之辰忍恥於
恓惶之日哉渭濱留釣鷹揚之業未萌緇源滯牧鴻漸
之資蓋寡及其攀穹運接靈期乘雲雷而清八極和陰
陽而調萬品則知冥機所運吉凶于倏忽之間玄命所
移飛伏於斯須之際日月自至聊復爾耳方今炎飈謝
節爽候闕辰風高而宇宙清霜下而亭郊肅歸雲止鴈
流曙響於東津落照開鴻寫晴規於北岸螢疎夕砌蟬

促朝林感序緣情故豐奇賞僕一違秦隴再革炎涼戒
征軸而無因指歸途而有倦故鄉超曠層山重複吳宮
尚遠頻驚去燕之心楚峽猶賒已下聞猿之淚徒以風
猷未隔道義相存幸承知己之心稍緩他鄉之思昔虞
公再見懸光白壁之前李布一言猶定黃金之諾況交
已成於杵臼道已茂於金蘭希照窮途遠流嘉貺若使
恩裁口腹空留安邑之賓惠闕始終取恨昌亭之客

與契苾將軍書

昊天不忱哲人終否畢公逝矣傷如之何敬想情則懿
親義惟良執非夫人之為慟其誰為慟乎僕與此公早
投交契夷險之際終始如一常思竝建忠孝之蹟共申
家國之讎壯志不就古人所悲何圖一旦長訣嗚呼哀
哉管仲不存叔牙空在子皮已喪子產何依興言追昔
良增痛悼適得韋四郎書具承大郎雅意知欲以此公
碑誌託之下走夫撫今懷昔理寄斯文旌德叙功事屬

知已是以子期幽思感叔夜之形言伯喈雄藻待林宗而無媿下走雖不敏幸託深期此而不為誰當為者但恐位卑先達才非拔萃虛承厚矚不副高聞謹遣舍弟勛往面取進止臨書啜泣慘惶不次

上百里昌言疏

附

勃言鄉人奉五月一日誨子弟各陳百里之術宣於政
者承命惶灼伏增悲悚勃聞古人有言明君不能畜無
用之臣慈父不能愛無用之子何則以其無益於國而
累於家也嗚呼如勃尚何言哉辱親可謂深矣誠宜灰
身粉骨以謝君父復何面目以談天下之事哉所以遲
迴忍恥而已者徒以虛死不如立節苟殞不如成名悔
過儻存於已為仁不假於物是以孟明不屑三奔之誚

而罷匡秦之心馮異不羞一敗之失而推輔漢之氣故其志卒行也其功卒就也此言雖小可以喻大此勃所以懷既往而不咎指將來而駿奔割萬恨於生涯進一簣於平地者今大人上延國譴遠宰邊邑出三江而浮五湖越東甌而度南海嗟乎此皆勃之罪也無所逃於天地之間矣然勃嘗聞之大易曰人之所助者信也天之所助者順也是以君子不以否屈而易方故屈而終泰忠臣不以困窮而喪志故窮而必亨今交趾雖遠還

珠者嘗用之矣書不云乎弗慮胡獲弗為胡成不勝憤
激之至謹上百里昌言一部列為十八篇分為上下卷
庶竭私款少裨公政追思罪戾若投氷谷謹奉言疏不
備勃再拜

王子安集卷九

欽定四庫全書會要卷一萬三千五百八十四集部

王子安集卷十

唐 王勃 撰

論

三國論

論曰漢自順桓之間國統屢絕奸回竊位閹宦滿朝士
之蹈忠義履氷霜者居顯列則陷犯忤之誅伏閭巷則
嬰黨錮之戮當是時也天下之君子掃地將盡雖九伊
周十稷契不能振已絕之綱舉土崩之勢明矣嘉平中

大黃星見楚宋之分遼東殷馗曰其有真人起於譙沛之間以知曹孟德不爲人下事之明驗也先時秦帝東遊亦云金陵當有王者興董扶求出又曰益州有天子氣從茲而言則長江劒閣作吳蜀之限天道人謀有三分之兆其來尚矣然廢興有際崇替遞來每覽其書曷能不臨卷而永懷撫事而伊鬱也嘗試論之曰向使何進納公業之言而不追董卓催汜棄文和之策而不報王允則東京焚如之禍關右亂麻之屍何繇而興哉至

使乘輿蒙塵於河上天子露宿於曹陽百官飢死於牆
壁六宮流離於道路蓋繇何公之不明賈誡之言過也
於是劉岱喬瑁張超孔伷之徒舉義兵而天下響應英
雄者騁其驍悍運其謀能海內囂然於茲大亂矣袁本
初據四州之地南向爭衡劉景升擁十萬之師坐觀成
敗區區公路欲居列郡之尊瑣瑣伯珪謂保易京之業
瓚既窘斃術亦憂終譚尚離心琮琦失守其故何哉有
大賢而不能用覩長策而不能施便謂力濟九區智周

萬物天下可指麾而定宇宙可大呼而致也嗚呼悲夫
余觀三國之君咸能推誠樂士忍垢藏疾從善如不及
聞諫如轉規其割裂山河鼎足而王宜哉孫仲謀承父
兄之餘事委瑜肅之良圖泣周秦之痍請呂蒙之命惜
休穆之才不加其罪賢子布之諫而造其門用能南開
交趾驅五嶺之卒東界海隅兼百越之衆地方五千里
帶甲數十萬若令登不早卒休以永年神器不移於暴
酷則彭蠡衡陽未可圖也以先主之寬仁得衆張飛關

羽萬人之敵諸葛孔明管樂之儔左提右挈以取天下
庶幾有濟矣然而喪師失律敗不旋踵奔波謙瓚之間
羈旅袁曹之手豈拙於用武將遇非常敵乎初備之南
也樊鄧之士其從如雲比到當陽衆十萬餘操以五千
之卒及長坂縱兵大擊廓然霧散脫身奔走方欲遠竄
用魯肅之謀然後投身夏口于時諸葛適在軍中向令帷
幄有謀軍容宿練包左車之計運田單之奇操懸軍數
千夜行三百輜重不相繼聲援不相聞可不一戰而擒

也坐以十萬之衆而無一矢之備何異驅犬羊之羣餌
豺虎之口固知應變將略非武侯所長斯言近矣周瑜
方嚴兵取蜀會物故於巴丘若其人尚存恐玉壘銅梁
非劉氏有也然備數困敗而意不折終能大啟西土者
其惟雅度最優乎武侯歿劉禪舉而棄之覩譙周之懦
詞甘忿憤而忘食聞姜維之立事又慷慨而言憊惜其
功垂成而智不濟豈伊時喪抑亦人亡乃知德之不修
棧道靈關不足恃也魏武用兵髣髴孫吳臨敵制奇鮮

有喪敗故能東擒狡布北走強表破黃巾於壽張斬眭
固於射犬援戈北指蹋頓懸顱擁旆南臨劉琮束手振
威烈而清中夏挾天子以令諸侯信超然之雄傑矣而
弊於褊刻失於猜詐孔融荀彧終罹其災孝先季珪卒
不能免愚知操之不懷柔巴蜀砥定東南必然之理也
文帝富於春秋光膺禪讓臨朝恭儉博覽墳籍文質彬彬
庶幾君子者矣不能恢崇萬代之業利建七百之基
骨肉齊於匹夫衡樞委乎他姓遠求珠翠廢禮諒闇之

中近抱辛毗取笑婦人之口明帝嗣位繼以奢淫征夫
困於兵革人力殫於臺榭高貴鄉公明決有餘而深沉
不足其雄才大略經緯遠圖求之數君竝無取焉山陽
公之墳土未乾陳留王之賓館已啟天之報施何其速
哉故粗而論之式備勸戒俾夫來者有以監諸者焉

八卦卜大演論

昔者聖人之作易也始畫八卦以通神明之德以類萬物之情以為分太極者兩儀也分四象者八卦也成八卦者十六將也司八卦者十二月也分十六將者三十二候也分十二月者二十四氣也分三十二候者六十四卦也司二十四氣者三十六旬也進退於三百六十六日屈伸於三百八十四爻往來飛伏之理盡矣其孤虛消息之端極矣三才之道不可不及也五行之義不

能復過也翕之以幽明張之以寒暑會之以生死申之以去就禍福生焉吉凶著焉成敗行焉逆順興焉賢者識其大者遠者不賢者識其小者近者奉之者則順背之者則憊圓立者稱聖偏據者號賢嘗試論之曰三才易之門戶也八卦者易之徑路也引而伸之終於六十四卦天下之能事畢矣陳而別之極於三百八十四爻天下之微理罄矣夫陰陽之道一向一背天地之理一升一降故明暗相隨寒暑相因剛柔相形高下相傾動

靜相乘出入相藉泯之者神也形之者道也可以一理
徵也可以一端驗也故天尊則地卑矣水濕則火燥矣
山盈則澤虛矣雷動則風適矣是以天下有風可以姤
矣則地中有雷可以復矣天下有山可以遯矣則澤上
於地可以臨矣天地不交可以否矣則天地既交可以
泰矣風行地上可以觀矣則雷行天上可以大壯矣山
附地上可以剝矣則火附天上可以大有矣風行水上
可謂渙矣則水在地上可以比矣雷出地奮可以豫矣

則風行天上可以小畜矣雷之與水可作解矣則風之與火可以家人矣雷在風上可以恒矣則風在雷上可以益矣風在地下可以升矣則雷在天下可以无妄矣風在水下可以井矣則雷在火下可以噬嗑矣風在澤下謂大過矣則雷在山下可謂頤矣雷在澤下可以隨矣則風在山下可為蠱矣澤上有水可為節矣則山下有火可為旅矣雷在水下可為屯矣則風在火下可為鼎矣水在火上可為既濟矣則火在水上可為未濟矣

澤上有火可以革矣則山下有水可為蒙矣火在地下
可以明夷矣則水在天下可為訟矣地下有水可為師
矣則山下有火可為賁矣澤上於天可為夬矣則澤下
有水可為困矣山下有天可為大畜矣則澤下有地
可以為萃矣以山在澤上可為損矣則澤在山上可為
咸矣澤上有火可為睽矣則山上有水可為蹇矣上天
下澤可為履矣則地下有山可為謙矣澤上有風可為
中孚矣則山下有雷可為小過矣山上有風可為漸矣

則澤上有雷可以歸妹矣此天地以對成之義陰陽反合之理故卦相次則反爻以成義易之八卦是也八八相生則錯卦以興理因而重之是也故聖人之道可縱焉可橫焉可合焉可離焉逆而陳之未嘗逆焉順而別之未嘗順焉三畫以變雖天地之數可無韜也九六相推雖萬二千五百之浩蕩不能踰於三百八十四三百八十四之糾紛不能踰於六十四重之以六十四不能過於八卦張之於八卦不能過四象紀之兩儀兩儀之

理達而太極得矣故古往今來寒進暑退生死亂動是非騰結未嘗非兩儀也而未嘗離太極也故曰有寒有暑則兩儀不廢也無思無為則太極未嘗遠也見之則兩儀忘之則太極夫然故不捨二求一未嘗離動以求靜未嘗離靜以達動也有可有不可非聖人之謂也無可無不可是夫子之心也然天下之理不可窮也天下之性不可盡也有窮盡之地者其唯聖心乎有窮盡之路者其唯聖言乎故據滄海而觀衆水則江河之會歸

可見也登泰山而覽羣嶽則岡巒之本末可知也是以
貞一德之極權六爻之變振三才之柄尋萬方之動又
何往而不通乎又何疑而不釋乎故孔子曰必也正名
乎名者義之本也非聖人孰能正之哉若抑末執本研
精覃思非聖人之書則不讀也非聖人之言則不取也
庶幾乎神明之德可通乎萬物之情可類乎本末之思
也夫何遠之有君子可不務乎哉

平臺秘畧論十首

孝行一

論曰昔之列桐珪建茅土者非一君焉至於孝思可稱
仁風茂著存乎緇牒十一而已豈非生於深宮之中長
於婦人之手膏肓積乎驕慢情愛淪乎嗜慾嗚呼有國
有家者可不誠乎

貞修二

論曰美哉貞修之至也或抗情激操仗清剛而勵俗或

理韻和神抱直方而守道或旌奇表善擢才於不次之
階或剖滯申嫌措辭於難犯之地竝能以禮昇降以時
舒卷既明且哲以保其身盛矣哉原夫御俗裁風變彛
倫者寄乎直全身遠害得隨時者存乎變夫然故進不
違義退不傷生清貞靜一保其道委迤屈伸合其度易
曰君子或出或處或默或語天下何思何慮同歸而殊
途百慮而一致此之謂也

藝文三

論曰易稱觀乎天文以察時變傳稱言而無文行之不
遠故文章經國之大業不朽之能事而君子所役心勞
神宜於大者遠者非緣情體物雕蟲小技而已是故思
王抗言詞賦恥為君子武皇裁勅篇章僅稱往事不其
然乎至若身處魏闕之下心存江湖之上詩以見志文
宣王有焉

忠武四

論曰陰陽代興剛柔合運威恩參用以成化文武相資

以定業況乎康侯自我宗子維城者乎城陽之權略明
決卒推呂氏之變任城之志意剛斷實啟有魏之業蓋
有助焉陳思雅懷忠勇義形家國表奏永昌洞曉兵數
績著疆場長沙武陵亦足云也

善政五

論曰東平以盛德匡時大興禮樂齊獻以至親統物光
濟中外淮陽安定峻必行之典安陸扶風深受遺之泣
能義形家國理極忠貞使黃河如帶垂芳不朽盛矣乎

守方雅以調蕃政用公直而掌朝論昂然直上凜有生
氣衡陽太原亦足云也

尊師六

論曰前史稱良藥苦口而利於病忠言逆耳而利於行
豈非事情竭於不顧主色期於難犯中人以下罕免斯
累其有抗辭必盡忠烈橫匪石之心聞善若驚君王動
順風之請相須之際良可詠也清河之恭慎真懇雅為
閔
上引聖朝下託師傅和矣哉

褒客七

論曰原夫重藝尊師登奇佇逸道存萬里神交一面故有推輪擁篲寡人忘千乘之榮越席分庭上才當四海之禮斯實藩邸之盛事間平之用心也而有矯情役智揚逸名利之間室隙蹈瑕乾沒英翹之地便辟脂韋飾其迹甘言巧辭運其辨假君王之顧盼用君王之威福傳曰好善而不擇人則前代有以之傾矣至於興諧文雅賞盡煙霞月庭廣闢風閨洞敞西園故事下蘭坂而

宵歌東苑遺塵坐槐庭而曉賦折旋書藝之圃翱翔儼
詠之隙洋洋乎亦為樂之一方也

幼俊八

論曰夫濫觴懸米翻浮天動地之源寸株尺葉擢捎雲
蔽景之榦豈非積微成大陟遐自邇易曰山下出泉蒙
君子以果行育德故考其前事備之于篇

規諷九

論曰夫陵谷好遷乾坤忌滿哀樂不同而不遠吉凶相

反而相襲故有全中率行用心於不爭之場杜漸防危
投迹於知幾之地昔之善持滿者用此者也諺曰禍不
入慎家之門前代有以之興矣至若中山激難重存親
禮武陵變色復延情愛子建之陳辭貢憤長沙之發對
因機雖亦各達其心未若洪慶之希聲也

慎終十

論曰詩云靡不有初鮮克有終若夫東平之奉憲遵約
耿介原陵之奏中山之見賢思齊慙懃濮陽之託庶幾

乎可謂慎終矣至子塵之奉行文處中慰之遠述河間
陳思尅已竝未易誣也

子塵以下
多訛誤

王子安集卷十

欽定四庫全書薈要卷一萬三千五百八十五

集部

王子安集卷十一

唐 王勃 撰

頌

乾元殿頌

并序

臣聞鵬霄上廓瓊都開紫帝之庭鼇紀下清珍野闢黃
靈之館兼山配極照鸞闕於霞標薦水涵元湛驪宮於
霧壑斯則神徵語恠功潛鳥跡之初理涉非經道昧鶉
居之始授鳳書而稽碧落仙構罕存按龜錄而質黃圖

金模間起粵若風移處閣增巢恢火運之機業拒嚮明
上棟括河圖之奧三堦布政詠匪日於靈臺百堵陳詩
頌斯干於考室亦有黃軒瞰月樵門顏九洛之功璿闥
排煙牧野構三河之酷御燕臺而臨北極缺王度於祈
招列雲閣而拒南山隕皇謨於軹道然則卑宮喪禮采
椽輕四海之尊豐屋延災柏梁非萬乘之有雖因時立
事奢儉殊流而弘道在人興亡迭運靈光未造不窺九
室之榮景福宏規猶擁三方之釁瞻風舊史逮曹馬而

無譏觀跡故遠歷周隋而未得自我唐太陵遷構均五
方於鶴几之前中野凝圖調六氣於虬牀之下坐圭臺
而清俯仰啓緯齊明臨鼎邑而重威靈雲雷合響得玄
功於大壯其至在茲乎我大唐雞渾制極樹神宰而制
山河鶴識裁儀闢太虛而有天地黃精吐瑞潛龍苞象
帝之基紫氣徵祥鳴鳳呈真王之表高祖太武皇帝虹
星湛色開寶胄於金壺蛟電凝陰發皇明於石紐白蛇
宵斷行移海岳之符蒼兕晨驅坐遘雲雷之業屬東隣

委馭扇虐政於叢祠北拱隳尊紊皇圖於寶極蜚鴻集
野瞻烏鮮投足之因青犢嘯風羣鹿無擇音之所天街
五裂截鯨浦而飛芒地紐三分觸鼇山而按節玄虬在
御掃圻甸而廓星都黃鳥分麾動扶搖而駭雲陣鑣官
杖鉞跨高陌而登元轡野韜戈陟圯壇而擁號皇圖不
恃聖人追卷領之風神器無私才子奉褰裳之運太宗
皇帝雲房揖契壓麟璽於庭軒雷渚翔英擾龍鈴於高
席八能亨運抗鵷邸而杖耒髦十亂恢基臨鶴州而擁

黃鉞唐雲秘族潛開白水之徵代景廻輪光踐丹丘之
運權輿象緯削茅社而建瓊桃草昧風雲席蘿圖而創
璿厯紫庭合粹括宇宙於宸襟丹宸凝尊運陶鈞於寶
思摘碧霄而鍊石上清耀魄之宮詔寰海而捐珠俯睇
陽侯之室功驅偃伯頓鶚視於華封道被來王靜龍吟
於武庫玄樞上運卜年開累聖之符丹竈昇遐遺範敞
謀孫之畫皇帝陛下椒庭襲慶曜璿萼於霞莊蘭殿分
休湛珠衡於月館道凝瓊鎮下蒼掖而照重熙業峻銅

樓憑紫軒而揖群后環四瀛於舜抱漏蟻覃津栖十景
於堯衿巢螟荷照上元開錄寶龜定皇邑之模下武崇
基飛龍錫帝臺之構貞明啟運齊玉鏡於鸞門易簡成
功偃銅符於鶴仗懷降尊於襄野泰階亡七起之勞念
負重於焦原巾席託三危之險臨翠嫵而則道天孕時
成坐玄扈而披圖神超物妙皇后星潏縱淑曳珠紱於銅
臯雲野疏祥抗瓊枝於桂浦素蟾登慶六虛充牝馬之
貞丹雀御林三雅合闕雎之好璿宮夜靜居龍幃而調

元金房晨開御駕階而緝化芝庭揖訓遠清和鳳之儀
蘭珮承風競峻當熊之節皇太子承雲紫座翊八柱於
乾維湛粹青衢揖三樞於地戶黃離踵曜太陽分銑樹
之輝蒼震荐音少海控銀河之色鶴筌飛奏想丹駕於
瓊山鮑俎捐芳齒玄冠於寶序彤闌問豎禮崇監撫之
威黼席興賢義極君親之愛若乃東門卹胤疊仙構於
熊山西苑承家導靈波於鴈沼桐圭作瑞鳳毛曜丹穴
之英茅壤分維麟距冠玄丘之俊吳宮延粹闢朱柱於

娥臺兌野流芬疏紫蘭於別館頻隈毓範雲扃分戚里
之驩覃與凝規星閣絕郎官之請雕龍命職縱跳澤而
驤鱗翠鷄調司順義颺而撫翼月軒宵佇虞谿降璿緯
之精震帳晨披姜水洞金韜之蹟飛鶴書而抽海狀桂
壑於是投綸轉麟旆而揖山容松澗繇其削衽軒圖瑞
喬泛花綬於雞林農紀祥炎濯蘭纓於鳳水仙臺倣務
三珪銓棘序之風天秩調邦六府變槐衢之典金門獻
納縱麟筆於苔牋石館論思覈龜章於竹葉淹中訪禮

蹲龍揚壁水之波稷下談經飛兔躍環林之秀詞庭吐
鳳翫鳥跡於春黌書帳翻螢閱蟲文於夏閣杏花千畝
紺轅照帝籍之功桑柘三宮玄紱降親蠶之禮圓丘上
闕奉蒼璧於靈壇方澤下凝列黃琮於寶壇朱絃翠瓚
履霜懷四響之尊複雷重簷涓日正三綱之首五靈奔
慶冠蛇澤於黃樞六祀銜欣颺麟煙於紺席遺弓積慕
虔深太廟之儀執豆推恩道振明堂之禮瑤山廣樂備
逸調於宮懸洞庭仙奏納遺歌於帝府九韶分唱后夔

清桂序之音六變同和飛鳳掌梧軒之律樽俎折旋之
數苞舉陰陽堂庭節奏之規彌綸宇宙靈襟索隱控風
伯於詞林睿想鈎深詔天吳於筆海神窮獨照旁探赤
水之珍思洽幾深迴寫丹谿之韻金壇紫露映銀籀而
翻華瑤林白雪藻瓊章而吐絢蟬機撮化銅渾將九聖
齊懸虬箭司更銀漏與三辰合運爽鳩分職素雲頽鳥
啄之祥神獬闕司玄水照龍顏之則黃沙鞠草剗叢棘
而遷訛丹石滋苔仰甘棠而息訟融臯再稔方聞外戶

之謠昧谷千廂坐溢康衢之奏百城煙峙望秋露而乘
風千室雲開合宵霽而組化彤幃獨選熊幡下蘆鴈之
祥墨綬分賢犀檢降槐鸞之祉筠驂佇信髦士剖竹而
相尋蒿杖霑仁鮐叟攀輪而不暇龍蛇可踐野人豐荷
杖之驩雞犬相聞城尉輟鳴桴之響五雲抽潤湛芳氣
於璿臺六府咸殷唱豐歌於銅闕不戒而畀東戶恩周
動植之津博施而舉南風化偃胎萌之寓神謀備預儼
七萃於丹樞邃略防微肅千廬於紫衛元戎握節黃公

授犀闕之圖帝座聞輦玄女薦龍庭之策賴柯棐刃中
權決勝於兩階白羽俄麾善陣推亾於四表朱匡反景
之域削蛇弭於文槐黑山明月之鄉委龍璫於武帳錦
軒星驚控乾絡而觀風繡服霞驚浹神絃而問俗川浮
沒羽鯨谿靜丹浦之虞陸薦飛毛熊嘯動青雲之偵銀
關驟雨望紫陌而趨恩鐵幌馳風計彤闌而瀝思赤馬
文援之寶叢積乎郊虞紈牛露犬之貢滿盈乎儲邸青
丘畫野不踰征賦之鄉蒼水奉圖未盡提封之貫且夫

緯武經文宏業也含幽育明至誠也混齊六合大功也
規模百代昌數也故能襲九空而寧庶物劃千里而統
諸侯休徵象德而動嘉符觸類而至風揚晷洽藻乾慶
於芳年司節河清藹坤禎於明渚瑤枝結慶泉埃蕩玉
蓋之文瓊液浮甘天酒綴金莖之色黃蕤紫脫湊仙穎
於中畿翠萐丹莖疊靈株於上序駢眸候日漾影蒙池
比翰翻風栖光理木祥飛井絡震鱗題瑞朔之元祉絢
新郊枵獸紀和年之序具靈篇之絕貺究仙謀之殊休

天人之際交矣皇帝之道備矣繇是三靈物覩扣蘭禁而棲誠九服子來詠蒿宮而騁力去奢去甚不矜黃屋之隆匪樸匪雕方順丹墀之請宸規相宅考周舊於靈都睿覽思和獲秦餘於正殿群臣列陞奏蕭相之遺模天子臨軒採荀卿之故事炎洲八桂遙仙拱於林衡岱畎五松委靈材於梓匠衢宮記範萬機抗九戶之尊海孽移琛千樂省十家之費飛廉卷藹徹煙極而浮甍屏翳收津劃星墟而置絜瑤階百雉光懸寶露之壇瓊壁

萬尋影綵崇霞之閣拖虹梁而四注星漢虧於上榮疊
雲棟而三休寒暑隔於中雷雕楣鶴企沓勢分規繡栊
虬奔殊形別起圓璫布藻聲羽壁於狼泉方鏡披蓮孕
化璣於蜃浦芝樓對幄熏傳五日之風芸閣列錢彩鍛
三旬之霧文疏罩迴陰兔息肩於綺寮翠幌籠霄陽烏
鍛翼於珠網豐隆按節下複櫺而司階列缺施鞭低叢
楹而假道溫房佇幸煦芳景於佳辰涼室乘閒凜徂飈
於火序金鋪夕照若帝圃之輝瓊英寶綴晨懸類阿房

之聚銀燭煙丘碧桂翊珉陛而披香雨岫頽筠夾璿流
而颺影九衢翻翠襍仙卉於中達四照霏紅間靈葩於
右城神禽率舞光浮肆夏之軒瑞鳥相鳴響叶鈞天之
樂鈎陳宿列儼雙碣於丹霄綺繳霞周闢千門於紫露
爾其左局嵩鎮申侯降太室之禎前枕莘郊伊尹發空
桑之秀揭熊山而北眺貝闕猶存覩龜溜而西分瓊臺
易接總交中宇廓川陸而疏畿竟想善鄰揆風霜而建
野然則因秦構極祖宗耀金策之符作洛恢基我后創

璿居之始援天引聖隔代重暉橫紫都而可襲配玄宮
而非遠故能使神光夜燭鏡麟趾於文除仙渰晨華委
鸞章於繡礎靈文密發八方昭大有之和寶篆潛開六
合啟同人之會兩儀交慶虛碧墀而翹旌萬宇披歡指
蒼車而候蹕雖青蒲頌德東朝獻龍鳳之圖而丹極鳴
謙南面動韶羊之詔百神推策望璆徑而虔誠三讓奉
符顧瑤壇而肅事龜書吐瑞按五校而分營鳳策揚輝
翔八鸞而節步帷宮霧轉列芝蓋於中天帳殿星離輶

蒲輪於大野紫鱗充饋若大帝之共臨素鶴翔華類群
仙之廣宴花開瑞雪委瓊饌而調芳綵絢祥雲夾珠旗
而曳影功推三祖銀繩勒東岱之威業峻一人金策奉
南山之壽道既成矣玄符集矣代既貞矣元勲緝矣運
三辰而虛玉柄風兌渙其中孚懸五禮而偃金科雷坎
光其作解奔烽舉爵溢仙酒於中衢疊鼓分餉浹宸輝
於下里吞九重而上運控八聖而遐征翔赤驥而睇風
區吟翠虬而掩霄甸隱隱轟轟雷動天驚回輿斜眄而

降乎乾元之殿司宮庀職肅坻堦而神行掌舍巡方煥
巖廊而洞啟赫若朱螭負漢而輝橫海之鱗默若蒼鵬
架壑而振垂天之翮千官曉次儗銀榜而端簪萬戶宵
披候瓊膏而肅帶靈戈列陞天官具三揖之儀雲輅充
庭宗伯寅九賓之禮瑤鯨戒響懸猛簾於端闈銅狄分
形肅嚴局於左序排紫微而立極宸儀冠明后之三俯
黃道而披軒仙厯用乾元之九蕩蕩乎何聖人之無外
巍巍乎而神功之不窮也臣勃席芳十步企景三冬雖

承宣室之談猶窘靈臺之影仙壇遠秘已多謝於祥鸛
大厦初成復攀榮於賀雀慨深梁甫終乖捧日之歡恩
極甘泉未動淩雲之價神圖不測固流絢於丹縢微志
可存庶鐫芳於翠琬敢獻頌曰

紫局垂耀黃樞鎮野銀樹霜披珠臺月寫嚮明立極橫
神廓社大壯摘爻斯干韻雅

其一

鷄居化沒狙訛道長瓊構霞明璜軒露敞棄人崇欲違

天蠹象南巢不救東鄰長往

其二

瑤緘考懿金板藏功道凝茅屋業盛蒿宮龍階察祲鵷

閣調風推訪華禮酌儉思冲

其三

懸釐結疊傳翼生災千甍嶺接萬拱星開爭圖絢侈福

極凶來風寒碣館露慘蘓臺

其四

十館瑩秦金房砥室千間架漢韜雲閔日濟惡承危同

亡異術傾輶未遠遺墟繼出

其五

龍川結禍鶴塞稱符塵驚八際霧慘三都穹廬寶極屬

幕璿樞司宮墜典掌舍淪圖

其六

蒼衢毓社丹丘表聖鳳矯仙樞龍迴寶命道凝金冊功

馳玉鏡紫氣抽華黃暉疊映

其七

神稽鶴識迹播雞渾重光累極翼子謀孫經天緯象就

日提元鸞軒湛粹鳳几裁尊

其八

祥抽紫厯業照彤管珍雀朝翻仙蟾夜滿丹壚獻跡青

臺墜卯椒閭儀風芝閨奉款

其九

登三建緒明兩開儀龍譙霧鬱鵷禁霞披浪分璿渚景

峻瑤枝黃扉曉列丹轂宵移

其十

龜文獵彥麟旌訪逸桂客攀榮松賓改律紫鵷開紀丹

虬聳秩縱壑搏颺登山捧日

其一

功融棘序道備槐庭不仁者遠惟道斯行煙搖墨綬電

轉朱駟境懷春翟野散秋螟

其二

鄭竹分科燕棠輟諷銅機化極珠囊業洞禮貴丹虬樂

調朱鳳珠垠獻寶綿鄉委貢

其三

龍闕靜析鶴塞投弦歌呈豹尾舞進之肩銅鏡月斤鐵

輞星懸繩幽架險驛霧馳煙

其四

霧壇凝紫河宮湛碧翠菱翻飈丹萸候魄霜均電散連

珠契壁藹蓋籠霏花衢墜液

其十五

年和政美化極風調靈臺軫詠考室興謠循圖訪典去

泰捐雕道存南面讓屈東朝

其十六

望雲裁構籠霄建宇方鏡星離圓璫月聚梓匠傾思林

衡授矩畫拱栖煙文軒架雨

其十七

芝房疊翠桂廡流丹霞張萬戶霧葺千櫨重局駐燠洞

牖栖寒神加有敘貺八無端

其十八

帝圖臨御皇僚萃止電戟揮霜雲旌拒畧紫宮可逼黃

街易履鳳礎騰文麟庭抗禮

其十九

珠泥暢績銀繩鬱契鶴嶺雲明龍壇景惠道超中古功

推下濟惟帝惟天惟天惟帝

其二十

拜南郊頌

并序

微臣上稽龍繇下閱龜謀觀天地之至道考皇上之大
節武宣七德未嘗踰息亂之鄉文招九功未嘗出昇平
之域竝能懸日月而高視駕雷雨而先鳴或皮幣而踐
天階或干戈而躡乾步至於理定創禮功成作樂振長
策以叙諸侯設靈機而制羣動猶虞階已泰不能息洞
庭之誅夏載克寧不能罷會稽之戮故將體剛柔而立
本法震曜而崇威一戎而寓縣平四罪而華夷服然後

皇旗大輅詔殊號於圓丘電轉雲迴奏立符於孝理天
下黎人知四海之安樂寰中殊域奉三寧之康泰德兼
祥風灑道與和氣游不言而大寶用貞無事而元功有
立捨彼代也其誰與哉若夫應運而生繼天而作鼓動
千載之下超騰百王之上遂能發軒庭之景曜躡隋運
之頽風揖讓而取文明指麾而清函夏則我皇唐得之
矣高祖以黃旗錫瑞靜雲火之橫氛太宗以赤羽登期
補星辰之絕縷授瑤圖於斯邑付璿厯於均臺人更三

聖道昭千古於是俛臨睿極趨四荒於鳳闕之前端委
廟堂調萬國於龍軒之下八鸞徐動頓湯文於後塵九
駿長驅佇堯舜於中路邦家之具得矣易簡之業存矣
猶有朱蒙戾俗違光蓬艾之間青激遺眚假氣陶鈞之
內背熊山而構虐擁狼潭而稽誅竊瀛海之風波弄乾
坤之綱紀漢圖西返惟收五郡之名魏律東窮未出三
韓之險姦謀蓄於有漸逆節成於不悔長蚊蚋之雷霆
附豺狼之羽翼豈知夫至人無外撫天下以爲家真數

有歸弔群方而罪已三門遯甲黃公成不戰之師五壘
神兵玄女下先登之策肅牙璋而按律輝旄節而分麾
降南宮之元老裂西營之殺卒良將首路偏戎竟野舳
艫萬里旌旗四合金箱玉匱司空憑首勝之威鸛視龍
趨將軍仗萬全之略負鼇丘而峻壁據黿壑而深溝一
鼓而亭塞無塵七縱而江山失險伐罪以明而不以衆
懷遠人於絕境均惠化於殊隣登若木以照臨折紅桃
以延佇然後分州列鎮對明月以收營返旆旋戈部玄

雲而振旅望神都而獻捷仰靈社以書功辛亥謁於昭陵
癸丑告于太廟時乘黑帝月旅玄枵大唐有國之五
十一年皇帝有天下之一十九載也元惡既殄萬宇清
矣元勲既輯萬寶成矣以為周郊上帝裁延肅慎之賓
漢禮甘泉未拯朝鮮之亂想玄功而以側奉先旨以遲
廻思答上靈之心以洽庶黎之望爰考古日遂淨行宮
有司具典乘輿乃出撫玄蚪戴翠鳳翥鼓按節鯨鐘疏
響千乘嶽動萬騎林廻星陳而天行雷震而霧合是時

未登夫泰壇也廼齋帷宮宿帳殿華蓋移影鈎陳從蹕
千營夕布亘蒼野而煙凝萬幕宵懸背黃闥而霧列既
而屏翳清曉飛廉警旦孫叔奉轡王良聳策雲藏星謐
宇曠山明旌軒具照簫笳互凝陟名嶽以告成歷神丘
而展事國容象物而動朝章視令而肅宸儀有睟虛徐
大帝之庭列侍無譁髣髴華胥之國於是襲衮服戒俎
豆端瑞班儼華旒樂懸六代禮備三古奠惟蒼璧藉用
白茅鳴孤竹之簫管奏空桑之琴瑟感格以誠不以事

動植咸驩敬神以道不以華天人合應然後駐聲名於
上邑反文物於仙宮因雷雨而作施法雲天而用饗風
行電舉未寸景而浹九埏野忭途歌不崇朝而晏六合
我之玄極孚矣我之能事畢矣趨帝宸而振足越皇衢
以驤首不其休哉雖睿化無方比神圖而絕唱而小臣
不佞撫洪筆而當仁敢作頌曰

遼河巨浸碣石危峯城分玄菟塞接黃龍憑遐作梗恃
險忘恭人殘鬼哭主閭臣兇有晉不綱戎麾內逐帝隋

失御皇輿外驚九縣塵征三靈霧黷長茲下慢逋我天
戮五材無隕干齡有聖武創元基文清寶命波恬四海
明宣七政息衆以寧綏荒以令飛龍繼跡鳴鳳重光遂
均夷夏迭用柔剛戈船泛月劒騎橫霜風驅海石電掃
辰陽帝師無戰神兵有伐丞相陪麾司空仗鉞危雲旦
起長星夜發萬壘爭屠干城自蹙功超薄伐義極兼該
殊方底定善陣徐迴歸俘獻捷課績分材建侯清廟偃
伯靈臺考事龜謨凝清鳳宸仰觀俯察享神作祀道則

推天功非在已豐隆旦出招搖夕指神壇嶽立齋館雲
深鑾旗曉引葆吹晨吟山明野徹日降天臨鏘鏘盛服
肅肅珪簪俎豆畢陳笙鏞間撫玉觴分獻金罍暢矩青
帝鳴琴朱靈會舞上和下悅神歆人聚收驩巨野反旆
靈躔思周宇宙樂極寰埏德因時立頌以詞宣帝之功
也臣何飾焉

王子安集卷十一

謹案卷九第二頁前七行曾無繫鐘鼎石之榮非
有南隘北閤之援二句疑有訛字檢英華本亦
同

第十九頁前一行上百里昌言疏刊本疏作書檢
文苑英華作疏編入雜疏門內按此文結處有
謹奉言疏句今改作疏於目錄及本文題下旁
注附字以明體例

卷十第九頁前五行情愛淪于嗜慾刊本愛訛奔

今改

卷十一第二頁前四行其至在茲乎句上文疑有
訛脫

第七頁後八行劃星墟而置桀刊本桀訛槩按周
禮考工記匠人建國水地置桀以縣今據改

第十頁後五行嚮明立極刊本嚮訛響今改

第十五頁前六行惟收五郡之名刊本郡作都據文

苑英華改

第十五頁後四行舳艫萬里刊本舳艫訛作軸艫

據漢書武帝紀舳艫千里句改



總校官庶吉士臣侍朝

校對官編修臣沈清藻

膳錄監生臣馮國柄

幹也如此猶乃停旒正室嚴續中軒玉階匪泰金門為
險佇虹旃於月澗岳瀆生光飛鶴檠於煙臯江湖動色
桃溪逸彥塞丹井而歸風松磴遺英斬玄關而奉制位
兼河海九卿參巨濟之功道合星辰三事鬱經天之象
朱轡緝化泣故老於中溪墨綬宣風繞春童於上陌王
化之基已洽天工之代有序建銅儀而測曜象緯齊懸
按璿璣而書雲禎氛疊舉祥啞十二紫鵲調夏谷之音
大禮三千頽蛇應黃鐘之曲蠶功順令業著於青裳蜃

磨迎春恩周於黛耜黃砂靜讞爽鳩興頓足之悲丹石

銷冤神獬輟推鋒之計詠時和於帝壤動植咸驩歌道
泰於華封昆蟲自樂星墟列將輝玉節而長驅天策神
兵下金壇而決勝橫麾赤坂葱山成不戰之郊命繳青
丘桃野見其亡之兆煙馳火徼勵珠產而移琛雪驚冰
洲駕瑤谿而納賁乾坤徑復載遵赤縣之封曦望環周
未出黃圖之域故夫含吐萬物至功也制平八表大業
也一陰一陽神通也乃文乃武聖圖也用能使天不愛

寶地不藏珍日月五行風雲四序龍章鳳彩鳥奕於郊
墟黃鉉紫玉磊砢於垆圉集風雲於翠筵浴甘露於朱
英澤馬飛鑣山輿結轍殊徽狎至祥書竭東郭之毫累
譯同歸朝冊盡南山之竹然後瑤壇備物陳帝服而展
皇儀石室疇庸登太山而小天下功弘事畢狹廣宙而
三遷風舉雲搖歷神都而一憩考遺基於汶上稽故典
於淹中光總章之瑞紀嗣乾封之寶曆大矣哉昇中作
睿握四海而為尊則大斯模肇三宮而配永憑太室而

欽定四庫全書薈要

集部

王子安集卷十

二至
四

詳校官助教臣常循



欽定四庫全書薈要卷一萬三千五百八十六

集部


王子安集卷十二

唐 王勃 撰

頌

九成宮頌

并序


臣聞在天垂曜璿宮列乾象之墟在地班形珠闕鎮坤
靈之野洎夫三精駟運即寥廓而為宮九聖旋游遍洪
荒而可宅則有瑤房玉室崑山分大帝之庭金屋銀臺
滄海濯玄元之宇豈非神明其道騁仙轡於無垠浩蕩

其居示清都於不宰若夫扃牖六合奔走八神占日月而揆山川駕陰陽而法天地非聖人其孰能與於此乎至若文開遯甲仇峰域蒼后之躔樂奏鈞天峒嶺駐黃軒之駕業融環堵下姑射而尋真道濟巖廊望衡山而展事斯則三階遍下唯臨布政之宮六位時乘未及巡方之館其後兩龍齊驚抗瓊闥而同嬉八駿高驤指瑤池而結興殷風不競砂丘雄別館之娛秦道無章雲閣徇殊庭之賞於是功虧大壯頌闕祈招豐屋同志危輶

繼及遂使來年候跡名山為縱觀之塲竝海遵河沃野
盡行宮之地皇天震怒於上蒼黎眴慟哭于下土其有
斟酌千古文明一代蒿宮不陋茨山可仰祈誠東岳唐
帝復衢室之尊用饗西岐天子合鈞臺之運得其道也
蓋有存焉國家梯霄架極罄域裁基纂高丘白雲之肩
鬱函都紫氣之兆宸扉既闢一宇宙而來王聖籙潛躋
貳乾坤而作帝高祖天旗夜立制黃馬而先驅太宗日
馭晨飛驂綠蟠而首出雖立極承祧之業進燭前文而

重光累洽之符歸功下武陛下承靈太一踵睿登三星
虹沓祉電虬發慶丹書碧篆神符煥河洛之文玉斗珠
衡天骨挺皇王之表用能捨桐圭而宣七鬯肅玉籍而
揖宗祧寫霽九天騰景萬里御風雷七曜於上博臨之
功顯用山川六府而下輔相之宜得玄宮密運敷造化
於靈襟黃屋神凝創經綸於寶思鳳闈宵靜陰靈宣玉
闥之華鶴禁朝趨離象峻銅樓之景川分帝子控鯤壑
而䟽源岳動天孫擁熊山而列鎮其化成也如彼其強

幹也如此猶乃停旒正室嚴續中軒玉階匪泰金門為
險佇虹旃於月澗岳瀆生光飛鶴檠於煙臯江湖動色
桃溪逸彥塞丹井而歸風松磴遺英斬玄關而奉制位
兼河海九卿參巨濟之功道合星辰三事鬱經天之象
朱轡緝化泣故老於中溪墨綬宣風繞春童於上陌王
化之基已洽天工之代有序建銅儀而測曜象緯齊懸
按璿璣而書雲禎氛疊舉祥啞十二紫鵲調夏谷之音
大禮三千頽蛇應黃鐘之曲蠶功順令業著於青裳蜃

磨迎春恩周於黛耜黃砂靜讞爽鳩興頓足之悲丹石

銷冤神獬輟推鋒之計詠時和於帝壤動植咸驩歌道
泰於華封昆蟲自樂星墟列將輝玉節而長驅天策神
兵下金壇而決勝橫麾赤坂葱山成不戰之郊命繳青
丘桃野見其亡之兆煙馳火徼勵珠產而移琛雪驚冰
洲駕瑤谿而納賁乾坤徑復載遵赤縣之封曦望環周
未出黃圖之域故夫含吐萬物至功也制平八表大業
也一陰一陽神通也乃文乃武聖圖也用能使天不愛

寶地不藏珍日月五行風雲四序龍章鳳彩鳥奕於郊
墟黃鉉紫玉磊砢於垆圉集風雲於翠筵浴甘露於朱
英澤馬飛鑣山輿結轍殊徽狎至祥書竭東郭之毫累
譯同歸朝冊盡南山之竹然後瑤壇備物陳帝服而展
皇儀石室疇庸登太山而小天下功弘事畢狹廣宙而
三遷風舉雲搖歷神都而一憩考遺基於汶上稽故典
於淹中光總章之瑞紀嗣乾封之寶曆大矣哉昇中作
睿握四海而為尊則大斯模肇三宮而配永憑太室而

高視靈壇八百坐明堂而恭已諸侯一萬時既貞矣襄
城辭訪道之遊功既成矣玄圃頓尋仙之駕繇是南宮
奏議和玄禁而成章西土謳歌指皇輿而佇眷咸以珍
臺靚穆陽靈開避暑之宮清序鈞調景福制追涼之殿
然則高棟深宇威神之大節也順氣發生巡遊之大功
也况乎石城金室偏興井鬼之區珠藪瑤池宛在秦豳
之境應雷駟而出豫蒼帝其時回炎馭而思和朱明不
遠雖途吟野忭黎元忻望幸之符而屈已從人天子下

勞謙之詔候離局而從宴尚惕三危清近縣而移鑾猶
詳再駕以為三十六所帝劉非舜禹之心四十二宮全
趙異成康之厯詠荆臺而夕厲思蒲坂而晨凝方奉後
天之期俯順觀風之請萬靈禋社三辰合慶姬文考筮
容成奏日千旌鳳轉儼鏤象而星陳萬騎龍嘶伐靈鼉
而曉徹靜帷宮於綠野肅帳殿於黃街奔攬槍而走陸
梁陳浮靈而候明月前驅雷竦下列缺於騰鞭後乘雷
驚起豐隆於驟轂瓊戈晝運太陽疲轉日之鋒玉劍宵

翻懸象睹衝星之氣天旋霧散岳運川迴林兵護野方
神啟路黃麾紫蓋襍精氣而西浮雲動神行背封巒而
右指吐霧馳風以臻夫九成宮禮也爾時峰橫地乳景
戴天廩分閭井而圖基蔭秦星而耀趾靈墟寶藏代興
汧雍之間峻阜長岑疊鎮岐梁之域丹溪碧洞吐納虹
霓偃柏叢篁騰遷雨霧獲秦餘於故兆地擬林光訪周
舊於遺風山連水滸前趨劒棧王壘千尋旁望斗城金
墉萬仞架陰丘而北走境瞰廊祠分沓嶂而西馳塗交

隴坂仙都密邇猶連上苑之局靈宮巋然直透崇岡之
曲卽橋基於礧道利在斯干固拱木於虞衡規同匪日
彌峰跨谷層城萬轉歷險乘危迴廊四注山祇盡石出
微道而終年風伯羸糧半長途而中宿架千樓而掇極
爛若神扶羅萬戶而窺天巍如化立離堂早照皦日籠
光於綺寮合殿宵深歸雲納影於重廡珉房砥室畫拱
相望綠岫紅巖雕櫳間出玄熊蚪蛺俯棟宇而危心青
鳥歸飛仰靈軒而墜翼轉飛檐於秀嶠上出重冥陰反

宇於迴谿下臨無地紅葩紫萼垂倒井而披文金鎖銀
鋪接重局而炫色儼鈎陳於漢陌秦階非遠設陞戟於
煙莊仙梯可陟華璫壁散掛明月於崇朝密網珠連落
奔星於已曙丹樑發秀彩沓虹文皓壁凝鮮光含蜃氣
銅龍對雷接飛泉而瀑流鐵鳳連甍遡還飈而佇立雖
南躔統序北室開榮凜勁氣於叢楹起淒風於洞穴跋
烏失轡出澗戶而無光金兔低輪下山扉而變色陰庭
阻夏祝融無竊據之因邃屋乘春顓頊定忘歸之策飛

廉扣響赴北闕而神寒屏翳收津跼南端而股戰蒼蒼
八桂白露為霜落落千松玄陰昧景金人列陛來危砌
而思裴玉女窺牕伏層巒而請續陽秋代駕不凋仙圃
之華天地為鑪未解幽陵之凍至若氣清乾步景霽山
維栖翠謁於崇榮列朱霞於複榭瓊枝累道移綴文槐
碧樹周阿光搖鏤檻靜簾帷而洞啟穆羽相和肅坻壙
而天臨纖塵不動宸儀有睟蓬萊與城闕俱榮羣后多
歡薜蘿共簪裾合賞巖花落砌綴龍宸而成文嶂葉交

軒拂鸞旗而追影鑪峰轉靄香傳玉几之風石瀨鳴湍
響入銅壺之水乃有陵陽駕鶴奉丹墀而稱臣子晉吟
鸞下青蒲而謁帝箕精失耀傳說恭命於東廂昴宿低
芒庭堅奉職於西序三臺九署雲端極目霓裳風髻闕
下相尋張良卧疾攀赤松而有地綺季來朝歌紫芝而
忘返若夫功成旰食道濟宵衣漢宮追聽覽之餘堯殿
得巡來之隙霞登月憩光睿幸於彤闈玉振金聲藻宸
章於翠掖洛陽才子承閒盡宣室之談蜀郡詞人還奏

動甘泉之賦復有軒庭十四出桂闥而來茵永卷三千
望椒塗而奉幣翊鸞臺之廣宴扈駕砌之仙遊羅綺芳
兮四面春環珮鳴兮九重暮風閨夕敞攜少女於歌筵
月幌宵朧下姮娥於舞席玄房娛宴雲姬辭豹尾之歡
紺幄承顏星媛入魚鱗之戲若乃屯營櫛比對閭道而
斜趨解寺基分混文昌而外屬周朝瑞鸞聲參叶律之
宮陳寶鳴雞響禘司晨之序名都廣會閭閻萬室帝籙
仙垣亭臯千里山村野塾家連茵草之園谷飲川居戶

有桃符之水故夫恩加草樹圓原澤而無私道被翔行
苑山川而不禁每至旻天戒序高風嘯律虞官獻秋獮
之儀司馬奉梁騶之典將軍布卒略玄灞而東馳都尉
闕營繞黃山而北睇於是逢蒙列階蚩尤並轂材官發
射期門走仞仗玄麾而直指鶚視千羣奮朱鬣而橫行
龍驤萬計層旗廣旆出宇宙而三驅疊鼓鳴鐘連雷霆
而一呼前旌逐日夸父斷黃河之流後騎超山共伯挾
崑崙之柱近陵吐焰縹奔電於長鋒灌莽生塵隕飛霜

於勁鏃合戈鋌而照地猛兕知窮振罟網而籠天騰龍
失據崩林礫石毛羣無挺險之資蔭澤風山羽族落垂
雲之影長圍躑躅得駿馬於秦垓大輅徜徉載飛熊於
渭浦然後還師振旅考事陳功皮軒按節牙璋復路視
餘生於大野誓廣校於長陬班腥於薺薛之墟有蜡於
長楊之館命奔蜂而舉醕火照甘泉總輕騎而行庖雲
驚上路聲兼萬籥歌鐘空廣樂之庭禮被三雍玉帛盡
塗山之會龍胎鳳卵入禹膳而調芳石乳瓊漿委堯樽

而湛色恩霑下帛宴液仙宮雖大夫思濯鷗之歡而天子可迴鸞之奏然後拜釐清廟考德齋宮用玄工而不有宅太虛而無迹動崇易簡規萬祀而化黃金道貫幽明徵百靈而響丹甑得玄珠於舜海尚警永危朗天鏡於堯儀猶勤日昃虔恭上帝東朝懸待諫之旌清問下人南面聽登聞之鼓則有郊童俟蹕敢讓天師野老排闥唯歌帝力風行比屋忠臣收折檻之謀化溢康衢良使息埋輪之請設神規而動俗庶績其凝握元符而發

祉殊方合應華胥已泰濟羣生於不死之庭閭閻可觀
致仙厯於無窮之境蕩蕩乎發育萬物而顯諸仁洋洋
乎包舉六氣而藏諸用均兩儀而得一恥三皇而不四
者矣臣勃東臯賤節北阜幽姿常叨召見之恩驟玷明
敷之列書生謁相望闕推輪下客遊梁榮參賜帛終童
立志空投函谷之繻馬令同時未給尚書之筆雖玄機
妙鍵已寂兆於忘言而詠德陳功請追聲於匪頌其詞
曰

九門浩蕩三山超忽帝坐金房仙成玉闕浮丹麗紫棲

霞冠月真匠難徵虛談易越

其一

旋窺鳳紀極睇龍墳曾巢化沒上棟爰分茅宮蔽雨松

殿來雲猶迷匪陋尚缺斯文

其二

道倫明一風遷繼五禮讚三宮詩歌百堵黃圖未洽紫

庭無輔局促墉垣逡巡度矩

其三

盛衰環襲冲盈舛驚璿宇夏關瑤局殷樹奢窮地絡毒

流天步相日遄奔尋雲速仆

其四

災延六國運逼三川分雄競侈禮僭圖全飛藹月徑列

庶霞阡乾谿敗楚碣石亡燕

其五

阿房秦構文軒五里建章漢立仙闥萬祀詭代齊涇違

天縱已望夷有豐甘泉不祀

其六

宛郊嗣錄譙鄉警衆蜀跨梁岷吳吞楚夢相宜裁軌崇

楹累棟雲闕同華泉臺罕共

其七

晉圖終否胡風肆極霧黯丹圉塵埋紫域皇階不守帝

庭無色帳殿相臨氍毹間飾

其八

南承有宋北洎亡隋功慚戶牖守在城池樓船水覬車

陣山窺吳庭再毀代鼎三移

其九

火德初融江陽振旅奄收淮船遂朝吳渚象錯驕秦龍

舟壞楚雄圖乃溢傾宮不處

其十

海岳呈華風雷寫慶剪諸戎首先我靈命紫氣雲蒸黃

星月映轡商為業遵唐啟聖

其十一

景閔丹繩祥抽翠籙格天垂範模神驚躅朱極重光黃

離繼旭道清金鏡時和玉燭

其十二

徵規鳳闈毓訓鸞闈桐宮宿列桂邱霞飛台精變道岳

耀裁幾朝盈振鷺境比馴羣

其十三

武韜弓矢文經步驟夾鳩議獄龍師掌奏玉帛華夷提

封宇宙譯書歲款祥圖月湊

其十四

帝功得一乾元用九鏤玉天齊塗金社首神京四邑明

堂八牖變而可大為而不有

其十五

曾宮望幸華封佇悅伺隙披圖乘時徙轍赤駟俟駕蒼

虬按節月車宵移星闈曉列

其十六

方神護野岳將清塗迴麾嶠路逗蹕山樞千靈電驚萬

辟風趨鈞臺有問峒岫無虞

其十七

五城分秀雙巒抗影畫拱彌峰雕甍亘嶺烟闌夜謚雲

房畫靜竹殿栖寒松軒祕景

其十八

紫庭晨御彤闈早闢天子凝旒辟公奉璧薜蘿齊致簪

裾混迹仙鶴隨輪靈鳬隆舄

其十九

風扃濬敞震廓藻邃玉網星開金鋪月墜山樓獸矯雲

臺鳥次複嶂披丹迴流轉翠

其二十

仇夷聖宅姑射神心樂翔丹鳳使引青禽義壇葉暗禹

洞花深沼分瑤水花跨珠林

其二十一

順時宣節分戎講將星騎朝飛雲羅夕張寶雞獲祉非

熊入貺駕掩岐蒐禮高秦望

其二十二

鄴庭未遠塗山有戮襄野迷軒清都宥穆罕夷乾步徒

豐帝屋光總大猷允歸天祿

其二十三

命官垂訓靈臺韻雅功映寰中頌流天下皇圖已泰鴻

筆難假帝有力焉惡非能者

其二十四

贊

平臺秘略贊

孝行第一

受訓椒殿承輝桂闕資父事君自家刑國孝惟忠本忠
隨孝得履薄臨深惟王之則

貞修第二

列藩好德清修互起峻局剛情中孚素履道契玄極芳
圖青史為善不同同歸于美

藝文第三

榮分上郎業盛文場爭開寶札競聳雕章氣凌雲漢字
挾風霜後之來者其在君王

忠武第四

闕

善政第五

榮開社稷業照旂常是恢藩化或固朝章功成道洽身

歿名揚惟忠與孝千載生光

尊師第六

奔霆易駭巨壑難遊主明臣直撫類相求道行言用性
逸神休吁嗟盛軌從善如流

褒客第七

功惟應物業貴逢時君王樂道上客含詞情起月肆興
入烟達文林辨囿何代無之

幼俊第八

列后雲騰英童霧躍年妙識遠理豐詞約寵照玉旗文
先銅爵勿疎小善方恢大略

規諷第九

寵榮有極恭冲是守軸碎羣毛金銷衆口全忠衛國順
時藏垢周之宗盟異姓為後

慎終第十

具覽藩猷遐窺國篆罕兼百行多褒一善履忠存性慎
終思遠生榮死哀身歿名顯

王子安集卷十二